

AKASHVANI AIZAWL

REGIONAL NEWS BULLETIN

HEADLINES (MORNING)

1. Aizawl khawpui chhung kawngpui thawmthat hna thawh mek chu kumin April ni 15-ah zawh beisei a ni tih ZPM chuan an tarlang.
2. Lawngtlai hmasawn theihna tura ruahman, veng 12 inelna Bawrsap Award hnuaiyah faina kawngah nasa taka hmalak mek a ni.
3. President Donald Trump-a chuan Gaza-a remna leh muanna tlo zawk ngaihtuahtu tur Board of Peace ah Prime Minister Narendra Modia tel ve turin a sawm.
4. Prime Minister Narendra Modia chuan nimin khan Assam leh West Bengal-ah hmasawna hna project cheng vaibelchhe 7780 hu a hawng.

<><><>

ROAD MAINTANANCE

Aizawl khawpui chhung kawngpui thawmthat hna thawh mek chu kumin April ni 15-ah zawh beisei a ni tih ZPM chuan an tarlang.

ZPM party thuchhuah tarlan dan chuan, nizan khan ZPM Vice Pesident Pu C. Lalunnema leh General Headquarters hruiatu thenkhat ten Aizawl khawpui chhung kawngpui thawmthat hna thawh mek an tlawh a. Hna viltu PWD te chuan tlawhtute hi lo dawngsawngin, nizan khan Bungkawn leh Nursery inkar thawh a ni a, mipui hriat atana pawimawh te an lo sawi baw a ni.

Pu C. Lalunnema chuan, Chief Minister Pu Lalduhoma leh PWD Minister Pu Vanlalhlana te thahnem ngaihna zarah Aizawl khawpui kawngpui thawmthat hna lian ber an kalpui thei tih an sawi a. Thawktute chawl lova zan tairek thlenga viltu PWD te chungah an lawm tih an sawi bawk.

Aizawl Road North leh Road South PWD hna vilnaa a khaikhawmtu ber Pu Lalringgheta, SE, Central Circle chuan tuna hna hi Aizawl kawngpui resurfacing project awm tawha lian ber a ni a ti a, km 83 thawmthat a ni dawn tih sawiin hna hi kum 2024-25 hmalakna niin, nikum April atang khan contractor-in a thawk tan a. Kum 2025-26 hmalakna-in km 20-30 hna a awm leh mek tih a sawi bawk a ni.

Bungkawn atanga Nursery thawh zawh a nih hnuin Maubawh thleng meter 600 hna thawh chhonzawm a ni dawn a. Hnathawktu hi NIDIH, Silchar an ni a. Anni hian Aizawl kawngpui thawmthat hna 'package' hniha then chu hmun hrang hrangah an thawk mek a ni.

(PR)

<><><>

PM VISHWAKARMA HAAT 2026

Sorkar laipui hmalakna zinga mi PM Vishwakarma Haat 2026 chu nimin khan Union MSME minister Jitan Ram Manjhi chuan Delhi-ah a hawng a, he hunah hian Mizoram atangin mi pathum an tel.

Mahni kutkawih thiamna hmanga thil siam chhuah zuar chhuak zingah hian, Mizoram atangin Lalmuanpuii, Kawnpui bakah Aizawl district atangin C. Lalfakzuali leh Lunglei District atangin R. Lalremhlamawii te an tel bawk a, an kutkawih thiamna hmanga an siam chhuah te an zuar a ni.

Akashvani News Aizawl zawhna chhangin Kolasib District atanga tel Pi Lalmuanpuii chuan, PM Vishwakarma Scheme chu tun hma atanga a hriat tawh leh kum 2023 khan a inziahlul tawh thu a sawi a, inchhung cheimawina bungraw hrang hrang a siam te chu kum 2017 atanga bul a lo tan tawh niin, kum 2024 November thla khan Aizawl Sipai Lammualah pawh a lo inzuar chhuak tawh tih a sawi bawk.

Pi Lalmuanpuii chuan an kut themthiamna sorkarin a hriatsak ve chu lawmawm a tih thu a sawi a, sum leh paia a hlawk leh hlawk loh ai mahin mirethei ten kalphung awmze nei leh mumal taka thil an zuar ve thei chu lawmawm a tih thu a sawi bawk a ni.

PM Vishwakarma Haat 2026-ah hian India ram state leh UT hrang hrang atangin mi 117 in an thil siamte an pho chhuak a. Vawiin January ni 18 atanga January ni 31 thlengin chawhma dar 10:30 atanga zan dar 10:00 thleng neih thin a ni ang.

(Desk)

<><><>

SIHPHIR QUARRY

January ni 9 tlai lama Sihphir Neihbawi-a Quarry chimin a delh zinga ruang hmuh loh awm chhun Samal Chakma ruang chu nimin chawhnu khan hmuh a ni.

Puan tawh angin Sihphir-a Lalchangliana enkawl lai quarry chu chimin a hmuna hnathawk an chhawrlai pahnihte chu in saseng an tumna lamah hnathawk pakhat zawk Minipur lam mi nia hriat chu a delah a, damdawiin panpui a nih hnuah a boral a, pakhat zawk hi Synod Hospital, Durtlangah an enkawl mek a ni. Quarry chim hian a thenawma Rody Zothanmawia Quarry-a hnathawk hnam dang pahnih a chhilh tel bawk a, quarry chimin a delh pakhat zawk Solen Tudu, kum 38 Jharkhan ruang chu January ni 14 tlai dar 4:30 khan hmuh a lo ni tawh a, hemi zan vek hian Sihphir thlanmualah vui liam nghal a ni. Samal Chakma ruang hi Post Mortem tih anih hnuah Salvation Army CO Durtlang in a vuina hun a hmang ani.

Mizo danah Sihphir Neihbawi-a quarry chim hi kar khat a tlin tawh avangin a zawn hna chu Zirtawpni zan khan tihawp nimahse tlawmngaiin zawn chhunzawm hna thawk zel a ni.

<><><>

BAWRHSAP AWARD

Lawngtlai hmasawn theihna tura ruahman, veng 12 inelna Bawrhsap Award chu hlawk taka kalpui mek zel a ni a, faina kawngah nasa taka hmalak mek a ni.

Lawngtlai Bawrhsap Pu Donny Lalruatsanga ruahman - kumtina chhunzawm tura tih Bawrhsap Award bultanna hi nikum November atang khan hmalak tan a ni a, Lawngtlai khawpuia Veng 12 ten an huamchhungah faina beihpui thlakin, kawngpui kam leh tuihawk luankawr te an thianfai a, veng mipuite hnenah vantlang tlangau kaltlangin, mahni In leh a vel vawngfaia, awmze nei zawka an lirthei leh hmanrua te dah turin an in ngen bawk a ni.

Bawrhsap Award hian Veng fai leh inenkawl na tha, Ran khuahkhirh leh Lirthei dahdan mumal te, nunphung tha inzirtirna leh midang tana hnawksak lo, zahawmtaka nun hona vawng tha te chu ngaihpaawimawh hmasak a ni dawn a, kumtinin Republic Day-ah Award hi hlan thin tura ruahman niin lawmman thatawk tak siam a ni dawn a ni.

Bawrhsap Award dawngtu tur endik turin Mizoram Journalist Association (MJA) Lawngtlai District ruat an ni a, anni hian thla tin Veng hrang hrang dinhmun an enfiah thin ang a, Republic Day hma hian veng 12 te hi wavi hnih tlawhchhuah an tum a ni.

(Lalnggheta Ralte, Lawngtlai PTC)

<><><>

ALCOHOL

Bairabi Police checkgate a duty-te chuan nimin khan Hailakandi District, Assam lam atanga rawn chho lirthei pakhat atangin Sapzu leh Beer thahnem tak an man a, Zu neitu a puh hi Bairabi PS-ah thubuai siamsak a ni.

Bairabi Police checkgate a Zu an man hi Royal Stag (whisky) Um puitling (750ml) 204; Kingfisher Beer Cane 336 (500ml) leh McDowell's No.1(Rum) a chanve um 384 a ni a, heng Zu te hi tualchhung rate-ah chuan Rs. 1,92,960/- man hu ni a chhut a ni.

Zu neitu a puh leh lirthei khalhtu hi Siaha mi KT Beiphasa (kum 30) MLT Act hnuai hian Bairabi PS-ah thubuai ziah luh a ni a. Waviin khan Kolasib District Court-ah hruai a nih hnu in, Kolasib District Jail-ah dah luh nghal a ni.

(Andrew Vanlalauva, Kolasib PTC)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vaviin chawhnu dar 2 leh a chanve-ah Chanchinthar puan leh a ni ang.

<><><>

TUIPUI FERRY

Lawngtlai leh Siaha inkara Tuipui Ferry Lei pawimawh tak, Siaha panna kawngpui Short Cut pawimawh tak chu Zirtawpni khan hawn a ni a, tui a len lai chuan lirtheite chu Marboat hmanga kai pui thin a ni a, tuilian a ziaawm lai-in Thing hmanga Lei dawhkai thin a ni.

Kum 2025 hmalam zawng khan MADC huam chhunga Tuipui Ferry khuain an dawh thin a, lei hi LADC leh MADC ramri a awm anih angin LADC leh MADC Sorkar hotuten kum inchhawka indawh chhawk ni se an tih angin kumin hian Lawngtlai Council Veng Dinthar LIKKBK Local Church-in an dawh a, an enkawl zui nghal dawn a ni.

Tuipui Ferry lei zawh tur hian 2Wheeler tan Cheng 50, Auto Rickshaw tan Cheng 100, Private Car tan Cheng 150; sumdawna lirthei LMV tan Cheng 200; 407 leh 909 tan Cheng 300 zel chawi a ngai a. Lei hi thawhtan zing dar 5 atanga Inrinni zan dar 10 thleng hawn thin a ni dawn a, Pathiannah chuan Lei kai man hi lak a ni dawn lo a ni.

(Corr)

<><><>

MUHCS

Mizoram Sorkar chuan Mizoram Universal Health Care Scheme (MUHCS) hmangtu damlote enkawl na senso atan cheng vaibelchhe 115.29 a pe tawh.

Sorkar hian MUHCS kalpuitu damdawi-in te hnenah January ni 16, 2026 khan Mizoram Universal Health Care Scheme Bill cheng Vbv 2.77 a pe chhuak leh a, MUHCS kalpuia nih tan April ni 1, 2025 atanga January ni 16, 2026 thleng khan Mizoram Health Care Society chuan MUHCS kalpuitu damdawi-in te hnenah damlo enkawl na senso Cheng Vbc 115.29 a pe tawh a, heng hi MUHCS kalpui damdawi-in hrang hranga damlo 68,022 enkawl na bill a ni.

Mizoram chhungah MUHCS Empanelled Private Hospital 15 awm tawhin, Aizawl-a hospital 7, Champhai-ah 2, Lawngtlai-ah 2, Lunglei-ah 3 leh Siaha-ah 1 a awm a. MUHCS Empanelled Private Day Care Centre 3 a awm mek bawk a ni. Mizoram chhunga sorkar damdawi-in zawng zawngah MUHCS hi hman a ni a, Mizoram pawnah empanelled hospital 27 leh Deemed empanelled hospital 12 a awm mek bawk a ni.

MUHCS hian kum 2025-26 atan sorkar hnathawk chhungkaw 36,324; Civil Pensioner 8,733; AB PM-JAY chhungkaw 2,20,463 leh a hranpaa pawisa chawia inziak lut (contributory) chhungkaw 20,213 an awm a, CSS leh grant-in ais hnuai thawk inziak lut zat erawh hriat theih a ni lo.

(Corr)

<><><>

MODI-TRUMP

US President Donald Trump-a chuan Gaza-a remna leh muanna flo zawk ngaihtuatu tur Board of Peace ah Prime Minister Narendra Modia tel ve turin a sawm. President Trump-a hian hemi chungchangah hian PM Modia hi lehkha a thawn a. He lekhathawn hi India-a US palai Sergio Gor chuan social Media lamah a tarlang a. Pu Trum-a chuan Middle East-ah remna tluantling thlen tura hma alaknaah Pu Modia chuan rawn zawm ve thei se a duh thu sawiin hemi rual hian khawvel hmun hrang hranga innghirngona ti bo tura huai taka hmalak puiah a sawm a ni. US President hian Israel leh Hamas ten Gaza Strip-a inkahhai an puan thawhnhina kalpui turah heng board member te hi a puang a ni.

Nikum October thla khan Israel leh Hamas sipaite chuan Trump-an remna siam tura a ruahmanna chu pawmin inkahhaiin a zui nghal a. Pu Trump-a Board of Peace chu Gaza mai bakah khawvel hmun hrang hranga remna siam tur pawl anga ngaih an ni bawk a ni.

(NewsonAIR)

<><><>

PM IN ASSAM

Prime Minister Narendra Modia chuan nimin khan Assam leh West Bengal-ah hmasawna hna project cheng vaibelchhe 7780 hu a hawng. Hei bakah hian Pu Modia hian Amrit Bharat Express rel panga a vailiam bawk a ni. Assam ah hian Prime Minister Modia hian Kaziranga Elevated Corridor Project cheng vaibelchhe sang ruk leh 950 chuang man Kaliabar ah lungphum a phum a. Thusawiin Pu Modia chuan km 86 thui corridor hi nungcha humhalhna kawnga tangkai tak anih tur thu a sawi.

(Byte)

(NewsonAIR)

<><><>